

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“E ua tuu hoi te Atua i te aposetolo i roto i te ekalesia, o mua ia; e te piti ra, e peropheta ia; te toru ra, e haapii ia, e te rave tapao, e te faaora ma'i, e te tauturu, e te faaite, e te parau eê.” Korinetia I, 12: 28.

Nu. 8.

Atete, 1913.

Mat. 6.

Teiheia Ra te Parau Mau?

(TUATIRAA.)

U A parau faahou atura Tihare e, “Ua faatupu anei te Mesia i te ravea mau? Te parau nei tatou, E. E au anei i te taata ia faahuru ê i te reira? Mai te mea e a'o te taata, e aore râ e melahi no te ra'i mai i te tahi evanelia ê, e ore anei oia e faahapahia e te Atua? Teie te parau na Paulo i nia i taua vahi nei: ‘Ia a'o atu râ matou, eiaha'tu ia, o te tahi melahi no te ra'i mai, ia a'o atu ia outou i te evanelia maori râ i tei a'ohia'tu e matou ia outou na, ia riro ia oia ei anatema.’ Ua tuu maira te Mesia i teie nei mau toroa i roto i te ekalesia, ei aratai, e ei haapii i to te reira, ia riro ratou ei hoê i te parau mau. E te taata o te ruri ê i te evanelia, e te haapii i te tahi evanelia maori râ i tei a'ohia'tu e te mau aposetolo, e anetimesia ia oia. Teie te tahi huru ê o te Ekalesia mau e te ekalesia Katolika e ta'na mau fanau'a tiamâ ore, oia hoi te mau haapaoraa mârô Porosetani. Tei te Ekalesia mau te mau aposetolo, te mau peropheta, te mau haapii, Korinetia I, 13: 28, te mau episekopo, te mau dia-

kono, Philipi 1: 1, te mau hitu ahuru, Luka 10: 1, te mau peresibutero, Ohipa 14: 23, te mau tahu'a, Luka 1: 5, te mau tahu'a rarahi, Hebera 5: 1, o te faatere i te Ekalesia i raro a'e i te aratairaa o te Varua Maitai. Tei te ekalesia Katolika e to'na huaai, oia hoi te hitu hanere e tiahapa haapaoraa êê o te mau Porosetani, te orometua tarahuhia, o te a'o atu i te mau mana'o o te taata i raro a'e i te aratairaa o te varua o te taata. E teie nei, teihea te ekalesia ma te aposetolo, te peropheta, te hitu ahuru, te mau tahu'a rarahi, te mau peresibutero, te mau episekopo, te mau tahu'a, te mau haapii, e te mau diakono, i haamanahia e te Atua ia haapao i te mau oroa mo'a o te evanelia?"

Ua parau maira te taote, "Aore e ekalesia mai tera e vai nei, a haamana'o râ, ia vai nei te mau haapii evanelia e tia'i, no te mea, 'eaha hoi ratou e ite ai i te faaite ore?' "

Ua parau atura Tihare, "A taio oe i te irava 15 no taua pene ra. Ua ui atura Paulo i teie uiraa: 'Eaha hoi te taata nei e tia'i ia faaite ia ore ratou i tonohia?' Te parau atoa nei Paulo e, 'E aore roa e taata e rave noa i teie nei tura no'na iho, maori râ o tei parauhia e te Atua mai ia Aaron.' Hebera 5: 4. Ua parauhia Aaron na roto i te heheu, Exodo 4: 14-17, e no reira e ite ai tatou e, e mea tia ore roa i te taata e a'o atu i te evanelia, maori râ ua parauhia oia e te Atua na roto i te heheu e te tohu. Mai te mea e ui atu outou i to outou mau orometua ia parauhia anei ratou e te Atua na roto i te heheu, e faaite ratou ia outou e, aita te Atua e maiti i ta'na mau tavini i teie nei mau mahana mai i te tau tahito ra, e no reira e ite ai outou e, aore a ratou e mana ia bapetizo i te taata ia matara te hara."

"Aita anei te Mesia i parau e, 'E haere outou e ati noa a'e te mau fenua'toa, e faaite haere i te evanelia i te taata nei' ? " parau maira Ioane te taote.

"Ua na reira oia, te parau atura râ anei oia i reira i te mau orometua i teie nei anotau? Ia haamana oia i ta'na mau aposetolo ia a'o atu i te evanelia, ua haamana atoa ia

anei oia i te mau taata'toa ia a'o atu i te evanelia? Ua parau atura oia i ta'na mau aposetolo e, 'E ere o outou tei hinaaro (maiti) mai ia'u; o vau râ tei hinaaro (maiti) atu ia outou.' I teie nei mau mahana râ e maiti te mau taata ia Iesu, e aita oia e maiti ia ratou. Ua tonono atoa'tura Iesu i ta'na mau tavini ia haere noa ratou ma te moni ore e faaite i te evanelia i te mau taata'toa. Luka 10: 4. Ua na ô atura Paulo e, 'Eaha ra hoi ta'u utua? teie ia. Ia parau vau i te evanelia a te Mesia ra, eiaha e hoo, eiaha vau ia rave i taua mea tia ia'u i te evanelia nei.' Korinetia I, 9: 18. Ua na reira anei te mau orometua i teie nei mau mahana?" Te na reira atura Tihare.

"Teihea maoti te evanelia?" parau maira te haapii ture.

"A faaroo maitai outou," parau atura Tihare, "ua ite paha outou i te parau ta Paulo i faaite atu i to Tesalonia ra no te taeraa mai o te Mesia. Tera te parau: 'Eiaha outou e vare i te taata'toa: o te taiva te tupu na na mua e tai ai i taua mahana ra, e faaitehia mai hoi taua taata hara ra.' Tesalonia II, 2: 3. E teie te tahi parau na'na ra: 'E tupu te ati rahi i taua anotau hopea nei,' Timoteo II, 3: 1, 'e ore ai ratou e farii ai i te parau mau, no te anoenoa o to ratou tari'a, e haaputu ia ratou i te orometua i au i to ratou iho hinaaro; e fariu ê hoi to ratou tari'a i te parau mau, a opai tia'tu ai i te fabula,' Timoteo II, 4: 3, 4, 'e hoho'a paiete hoi to ratou, o te puai râ o te reira ra, ua hunahia ia ia ratou,' Timoteo II, 3: 5. E ua parau atura Petero e, 'e riro atoa i te orometua haavare i roto i te ekalesia, e no te nou-nou tao'a ra, e tao'ahia ta ratou i to te ekalesia i ta ratou parau haavare,' Petero II, 2: 1-3. Teie te tohu na Mika, 'Tei te utua e haavâ'i to reira feia rarahi, e te haapii te feia tahu'a i te tarahu; e te tohu nei te feia peropheta i te ario; tiaturi noa'i ratou ia Iehova, i te na ôraa e, E ere tei roto â Iehova ia tatou nei? e ore tatou e roohia e te ati.' Mika 3:11. E teie nei e homa, aore anei teie nei mau tohuraa i tupu i teie nei anotau i rotopu i te mau haapaoraa mârô i Cherise-

tiano? Aita anei teie nei mau haapaoraa Cherisetiano i hapa i te ture ra, i ruri ê i tei haapaohia ra, i pi'o i te faufaa haapao-tamau-hia ra?" Isaia 24: 5.

"Ua tupu te mana'o i roto i to'u aau e, ua faarue roa te Atua ia tatou, e aita a tatou e ravea e ora'i," parau maira Maratala, te fatu no te fare tipaeraa.

"Aita te Atua i na reira," parau atura Tihare, "ua faarue râ te taata i te Atua, na roto i te ruri-ê-raa i ta'na ra mau parau, mai ta'u i taio a'enei ia outou. Area a faaitoito tatou, no te mea ua parau te Atua na roto i te vaha o ta'na mau tavini e, 'e ia tae i te tuuraa parau i te hoperaa mau o te mau tau ra, e amui ai oia i te mau mea atoa i te Mesia ra, to te ra'i e to te ao atoa nei, ei ia'na.' Ephesia 1: 10. Ohipa 3: 21. Ua ite Daniela e, e faatupu te Atua i ta'na basileia (ekalesia) i te tuuraa parau i te hoperaa mau o te mau tau ra. Daniela 2: 44. Ua ite atoa Ioane pîpî here i te faaho'i-raa-hia mai o te evanelia, Apokalupo 14: 6, 7, e na ô atura Iesu, 'e parau-haere-hia te evanelia o te basileia nei e ati noa' 'e teie nei ao, ia ite te mau fenua atoa: o te hopea ihora ia i reira ra.' Mataio 24: 14. E homa, eaha te huru o te tau hopea? "Mai tei te anotau ra ia Noa ra, oia atoa te haerea mai o te Tamaiti o te taata nei.' Mataio 24: 27. Ua tonohia Noa e te Atua ia faaara i to te ao nei, e e a'o i te tatarahapa ia ratou. Aita râ ratou i farii. E te mau taime atoa ta te Atua i tono mai i ta'na mau tavini i te mau peropheta i te ao nei, aita to te ao i farii ia ratou e ta ratou haapiiraa. Ua taparahihia te mau peropheta e rave rahi e te mau enemî o te parau-tia ra. E teie nei e homa, te ora nei â tatou i te Tuuraa parau i te hoperaa mau o te mau tau ra, e te amui noa nei te Atua i te mau mea atoa i te Mesia. Ua tae mai te melahi no te ra'i mai i te ao nei ma te evanelia e tia i te vairaa ra. E i te mahana 6 no Eperera, i te matahiti 1830, ua faatupu te Atua, na roto i te heheu i te taata, i ta'na ekalesia mau, i te Ekalesia a Iesu Mesia i te Feia Mo'a i te Mau Mahana Hopea Nei, i roto i te huru mau o te eka-

lesia, tei vai i rotopu i te mau taata i te tau no Iesu, e mai te reira mahana e tae roa mai i teie nei taime, te haere noa ra te mau hitu ahuru e te mau peresibutero i te poro-haereraa'tu i taua evanelia i faaho'ihia maira. Te pii nei ratou i te mau taata'toa ia faatupu i te faaroo i te Atua, te Metua mure ore, e i Ta'na Tamaiti ia Iesu Mesia, e ia tatarahapa i ta ratou mau hara, e ia bapetizohia e te taata i haamanahia e te Atua, e e farii i te tuuraa o te rima ia noaa ia ratou te Varua Maitai. Te parau nei te mau hitu ahuru o taua ekalesia nei i te mau taata'toa, o te farii i teie nei mau parau oaoa e, e ite ai ratou i te parau mau o te reira na roto i te mana o te Varua Maitai, Ioane 7: 17, e e roaa te mau tapao e te mau haamaitairaa ia ratou. E homa here e, e tavini au na te Atua, e te ani atu nei au ia outou e, e farii i te teie nei mau mea ta'u i faaite atu ia outou, e mai te mea e na reira outou, e noaa ia outou te mau haamaitairaa i parauhia ra. E peresibutero au i roto i Te Ekalesia a Iesu Mesia i te Feia Mo'a i te Mau Mahana Hopea Nei, e tei Roto Miti, i Utaha, to'u vahi parahiraa."

Ua maere rahi roa te mau manihini, area ua parau te mau taata, tei taio i te mau faahororaa ta Tihare i horoa'tu ia ratou e, ua tano maitai ta'na mau parau. Ua mauruuru ratou i te tatararaa i ta'na faaroo, e ia roaa te tahi mau parau faaite o ta'na haapaoraa ia ratou. Aroha ihora ratou ratou iho, e haere atura i to ratou mau piha taotoraa ma te mana'o e, e parau mau roa ta Tihare, e ma te hinaaro ia ite i te hinaaro o te Atua ia ratou ra.

(Te Hopea.)

“Na'na (na te Atua) i ho mai ia outou i te ite i te maitai e te ino, e na'na i ho-mai-atoa-mai ia outou ia maiti i te ora e te pohe, e e tia ia outou i te rave i te maitai e faatiahia'i outou e te maitai, e e faaho'ihia'i te maitai no outou; e aore ia, e tia ia outou i te rave i te ino, e faaho'ihia'i te ino no outou.” Buka a Moromona, Helemana 14: 31.

Te Parau Tuatapapa no
Iosepha Semita.

(TUATIRAA.)

PENE XXXV.

MATAHITI 1842.

Te mau opuaraa no Benete ia haamou i te Peropheta. Te hoê tohuraa. Ua parihia Iosepha ei hoa rave hara i te tamataraa i te taparahi i te tavana ra, ia Boga. To'na tapea-raa-hia, e te haavâraa. To'na faatiamâ-raa-hia.

AITA'TU e hoê mea te tiahi ê atu i te Varua o te Fatu i te hoê taata mai te viivii i te huru. Ua hanere te mau taata i roto i te Ekalesia, o tei hi'a i te mau toroa teitei roa ra no to ratou viivii. O Ioane C. Benete ia te hoê no te reira huru mau taata. E taata paari, e te turatura oia i rotopu i te Feia Mo'a, aita râ i tia ia'na ia turae i te mau faahemaraa, e no to'na viivii, faarue ihora te Varua o te Atua ia'na ra. Ei reira i haamata'i oia i te haapii atu i ta'na ra mau peu iino i te mau taata, e parau atura oia i te mau taata e rave rahi e, i parau na hoi te Peropheta ia'na e, noa'tu mai te mea aita te mau melo no te Ekalesia i viivii ore roa, e ua riro te tahi ei mau hoa rave hara no'ua ra. Aita oia i faaea i reira, ua opua râ oia i te taparahi ia Iosepha.

O Benete ia te generala no te Nuu no Navu, e i te mahana 17 no Me, 1842, haapaohia ihora te hoê aroraa haavare, e tei roto i taua aroraa haavare ra e piti tausani taata, i faataahia i roto i na pŭpŭ e piti ahuru ma ono. O Iosepha ia te generala rahi roa no te Nuu, e parahi ihora oia i rotopu i te mau manihini, i te hoê vahi e tia'i ia'na ia hi'opoa e ia mataitai i te aroraa. Ua tamata râ Benete i te taparu ia'na ia parahi i te hoê vahi i roto i te aroraa, e tia'i i te tahi mau hoa rave hara no'na ia pupuhi pohe roa ia'na, a faatere-noahia'i te aroraa, e mana'o ihora Benete e, i roto i te haruru

rahi e te auauahi, e ore e iteahia te taata mau tei pupuhi atu ia'na ra. Ua faaara maira râ te Varua o te Fatu ia Iosepha ia ore e haere, e heheu maira oia ia'na i te opuaraa ino no to'na hoa tahito, e no reira aore roa to Benete tamataraa i manuïa. I muri iti a'e i te reira, faarue ihora Benete i to'na toroa tavana oire, e ua hurihia oia i rapae i te Ekalesia; area râ, ani noa maira oia, ma te roi mata i te tahe-noa-raa mai, i to'na tiaraa i roto i te Ekalesia, e ua hi'o-aro-hia ihora.

E faaorehia a'era ta'na hara, haere atura Benete i mua ia Daniela H. Wele, o tei ore e melo no te Ekalesia i reira, e tapu atura oia e, aore roa Iosepha i haapii atu na ia'na i te hoê mea, na roto i te parau, e aore râ na roto i ta'na rave-mau-raa i taua mea ra, maori râ i te mau parau tumu mau no te Evanelia, e i te mau ture na te Atua, e no te fenua, e i te mau mea viivii ore atoa hoi. Ua fa'i atoa'tura oia i ta'na ra mau hara, e te mau haavare ta'na i parau atu no te Peropheta, i mua i te taatoaraa no te mau taata. Aita râ i maoro i hi'a faahou ai oia i te hara, ei reira ua huri-mau-hia oia i rapae i te Ekalesia, e faaarahia ihora to te ao nei i teie nei taata ino e te viivii. I teie nei ua riri roa oia i te Peropheta, e i te Ekalesia paatoa, e riro ihora oia ei tumu no te tahi mau haavare ino roa; no'na hoi i tupu faahou ai te hamani-ino-raa i te Feia Mo'a. E tia roa ia'na ia riro ei taata turatura e te maitai rahi, ia mau i te mau toroa teitei roa ra, e ia riro ei tavini faahereherehia na te Atua, ahiri i turae na oia i te mau faahemaraa. I teie nei râ, ua riro oia ei enemi no te parau mau, e ei taparahi taata i roto i to'na ra aau, e e oti a'era to'na oraraa poto hara, pohe ihora oia i te poheraa ri'ari'a roa.

I te hoê mahana, haere atura Iosepha i tera pae mai no te anavai ra, no Misisipi, mai Navu atu i Monatarose, i te pae Iowa, i pihaiho i te tahi mau taata no te hoê sotaiete, i parauhia "Masona Tiamâ." Te parahi noa ra oia i roto i te ata no to ratou fare sotaiete, mai te tia i te faaotiraa i ta

ratou apooraa i roto, a haamata'i te hoê paraparauraa no nia i te mau hamani-ino-raa no to Missouri i te Feia Mo'a, e parau atura Iosepha i te hoê tohuraa. Ua parau atura oia e, e ati-noa-hia te Feia Mo'a i te mau huru peapea e te hamani-ino-raa, e e tiahihia'tu ratou i te mau Mou'a Ofai ra. E taiva te mau taata e rave rahi, e taparahihia te tahi, e e pohe te tahi no te ma'i e no te parahiraa i roto i te toe-toe, area râ e ora hoi te tahi pae no te mau taata, tei faaroo i ta'na parau i taua taima ihora, e e haere atu ratou e tauturu i te paturaa i te mau oire, e e ite hoi ratou i te riroraa no te Feia Mo'a ei feia puai roa i rotopu i te mau Mou'a Ofai ra. Ua parauhia teie nei tohuraa i te 6 no Atete, 1842, e pae matahiti i mua'e i to te Feia Mo'a iteraa i te peho no te Roto Miti Rahi.

E piti mahana i muri a'e i te reira, i te 8 no Atete, tapeahia ihora Iosepha raua o Orina Poratera Rokawelee e te mutoi rahi e e toopiti tauturu no te mataeinaa ra, no Adamu, mai te parihia i te taparahi taata. E toru ava'e i mua'e i te reira, i te hoê pô, ua iteahia Lilaburana W. Boga, i te taоторaa i nia iho i to'na roi, i roto i to'na ra fare, i Inidipenideni, i te mataeinaa ra i Iaketoni, ma na puta ofai pupuhi e toru i roto i to'na ra upoo. Aita i ino roa taua na puta ra, e ora vave a'era oia. Ua haapararehia te parau e, na te mau Moromona i rave i teie nei ohipa ei tahoo ia Boga, no te mau taparahiraa i te Feia Mo'a, i ravehia e te mau taata i tonohia e a'na ra; aita roa râ e hoê faaiteraa e, ua tauturu iti noa'tu te hoê melo no te Ekalesia i taua hara ra. I roto i te ava'e Tiurai, e toru ava'e i muri a'e i te pupuhiraa, tapu ihora o Boga i te hoê pariraa ia Orina Poratera Rokawelee no te tamataraa i te taparahi ia'na, e ia Iosepha Semita no ta'na tautururaa i taua tamataraa ra.

I ani na hoi Boga ia Reinolada, tavana no Missouri, e i ani na o Reinolada ia Caralina, tavana no Ilinoi, ia tapea ia Iosepha e ia Rokawelee, ei na taata tapuni i te ture. Ua tausani hoi te mau taata tei ite ia Iosepha i Navu, i te ma-

hana i pupuhihia'i Boga, e aita roa oia i haere i Missouri, e no reira aore oia e taata tapuni i te ture no taua fenua ra. Mai tei au i te ture, ua titau te Peropheta ia afaihia i mua i te haavâraa oire no Navu ia faarookia ta'na parau parururâa. Aita roa tera na mutoi i faatia i te reira, aita râ ratou i ite papu i ta ratou ohipa, e no reira haere atura ratou i Tuinici e paraparau i te tavana ra, ia Caralina. Ia ho'i maira ratou, e piti mahana i muri a'e, i haere na hoi Roka-wele i te pae i te hitia o te râ, e i tapuni na hoi Iosepha mai te ore i hinaaro ia afaihia i Missouri, no te mea aore roa ia i au i te ture. Ua tamata te mutoi rahi i te haamăta'u ia Ema, na roto i te parau haamăta'u-noa-raa'tu ia'na, ia faaite atu oia i te vahi tapuniraa no Iosepha, aore roa râ oia i faaite atu.

Na roto i na ava'e e maha, te tapuni noa ra te Peropheta i Navu, e i te fenua i fatata mai, area i te hoê taime, haere taue noa maira oia i mua i te mau taata, e a'o atura oia ia ratou. Na roto i teie nei taime poto, papai ihora oia i te mau rata faufaa rahi i te Feia Mo'a, e ua papaihia te pae rahi no nia i te baptizoraa no te feia i pohe ra. Ua tamatahia te mau ravea'toa ia tapea ia'na. Ua parauhia e, e horoahia e 1300 dara i te taata te tapea ia'na, e parau haamăta'u ratou i te tono mai i te hoê nuu enemî i Navu e tauaahi i te oire. Ia faaroo Iosepha i teie nei parau hopea, parau atura oia ia Wilisona Lau, o tei faarirohia ei generala, e faaoromai noâ te Feia Mo'a i te mau ati, e au ai i te hinaaro no te Atua, ia parahi ratou ma te hau, e paruru râ ratou ia ratou iho mai te mea e tumu.

I te hopea, faatia ihora Iosepha ia tapeahia oia e Wilisona Lau, i te 26 no Ditema, mai te tiaturi i nia iho i te a'ona te hoê haapii ture maitai, o Buterefiela to'na i'oa, o tei riro ei auvaha ture na Iosepha, e i nia iho i te parau na Toma Forada, o tei maitihia ei tavana no Ilinoi i te hopea no to Caralina tau, e haere atura oia i Sipiringafiela, te oire rahi no Ilinoi, ia tamatahia i mua i te hoê pŭpŭ taata.

I te mahana hopea no te matahiti 1842, ua tuuhia te Peropheta e te haavâ ra e Pope, e ua faataahia te hebedoma i muri a'e no te haavâraa mau. Ua î roa te fare i te mau taata, e mau hoa e tahi pae, e e mau enemî e tahi pae no Iosepha, hinaaro ihora râ ratou paatoa ia ite ia'na ra. E tuuhia a'era, haere atura oia e farerei ia Forada, tavana, e hi'o noa maira te mau taata'toa ia'na. O te Sabati ia te mahana i muri iho, e ua hcroahia te fare hau no te haapao-raa i te hoê pureraa, e a'o atura Oresoni Haede raua o Ioane Tela i te hoê tiaa rahi taata.

Ua haapaohia te haavâraa i te 4 no Tenuare, 1843, e e oti a'era Buterefiela i te parau-hua-raa'tu, ua papu ia Pope haavâ e, ua tia ore roa i te ture te mau tamataraa'toa no te mau mutoi no Missouri e Ilinoi i te tapea ia Iosepha, e te afai atu ia'na i Missouri e haavâhia. No teie nei mana'o papu roa, i faatiamâ-faahou-hia'i Iosepha. Ua ho'i atura oia i Navu, i te 10 no Tenuare, e ou'au'a noa a'era te Feia Mo'a i te oaoa i te ite-faahou-raa'tu ia'na. Ua faataa ihora te mau Aposetolo i te 17 no taua ava'e ihora, ei mahana hae-haa, e no te haapaeraa i te maa, e te arueraa, e te pure, e no te fa'iraa'tu i to ratou mauruuru rahi i te Atua. Ua haapaohia teie nei mahana, e ua mauruuru ratou paatoa i te Atua no to'na faaoraraa i te Peropheta. I te mahana i muri iho, faaineine ihora Iosepha raua o Ema i te hoê oroa rahi no te Feia Mo'a, ei haamana'oraa i te matahiti hoê ahuru ma pae no to raua mahana faaipoiporaa.—OLE PETESONA.

(E tuatihia mai teie parau.)

“E ia parau noa oe i roto i to oe iho aau e, Eaha matou e ite ai e, e ere ia parau i te mea parauhia mai e Iehova ra? Ia parau mai te peropheta ma te i'oa o Iehova ra, e aita o muri a'e, aore i tupu taua parau ra, o te reira taua mea aore i parauhia mai e Iehova ra, na taua peropheta ia i parau teoteo noa ra te reira: eiaha oe e mātā'u ia'na.” Deuteronomi 18: 21, 22.

Te Mau Parau Api.

I TE 3 no Tiurai, ua tupu te hoê ueueraa fenua i ô Samoa e Tonga, e ua parauhia e, e mea ri'ari'a roa te reira. Aore te hoê taata i pohe, ua mehameha roa râ.

Na te hoê tamaiti i Canada, e iva to'na matahiti, i taparahi pohe roa i te hoê tamahine, e piti matahiti e te afa. I teie nei te haavâ nei ratou i taua tamaiti ra no te taparahi taata.

Aore â te hau Iapone i mauruuru i te hau Amerika, no to'na faatia ore i te mau taata Iapone e hoo i te fenua i Tarafonia, mai tei faaitiehia i roto i te vea no Tiurai. Te imi noa ra to Iapone i te ravea ia faatiabha ratou.

I te 7 no Tiurai, ua tama'i atu e 15,000 faehau Serevia i te faehau no Bulagaria, e ua haaati-roa-hia taua 15,000 faehau e te hoê nuu rahi roa, e ua pohe ratou e hope roa, maoti râ e 4,000. E mea ri'ari'a roa taua tama'i ra.

I te 10 no Atete nei, ua tae mai te pahi ra, o "St. Michel", te pahi auahi no te mau fenua e au mai i Tahiti nei. Na'na e afai haere i te vea, e te tao'a, e te mau horo patete. E riro paha i teie nei mau mahana, e reva'tu oia i te Tuamotu.

A faahoro ai te tahi mau taata i te hoê pereoo uira i Niu Ioka, ua farerei ratou i te hoê niuniu paraparau, o tei topa rii i raro, e ua tano taua niuniu ra i to ratou arapoa. Aore roa ratou i ite i taua niuniu ra, e ia farerei mai, ua motu ino roa te arapoa o te tahi taata, e ua pohe roa'tura.

I te 3 no Tiurai, ua pohe e 46 taata i te oire ra, i Chicago, i Amerika. Tera mai te tumu i pohe ai ratou, oia hoi, te veavea rahi. I taua mahana ihora, i te hoê oire i fatata mai, ua pohe e 13 taata. Te huru, ua puai roa te mahana i reira. Ua parauhia e, e mau fenua veavea to tatou mau fenua nei, area râ aore roa te taata i pohe no te puai o te mahana.

I te 24 no Me, i Calgary, i Canada, ua haapaohia te hoê motumoturaa, e i roto i te raone (round) matamua, ua pohe roa te hoê o na taata motu-motu. A motumotu ai raua, ua tano te rima o te tahi i nia i te taa o te tahi, e ua fati to'na a'i, pohe roa'tura. I te 19 no Tiunu, ua afaihia te tahi o na taata motumotu i mua i te hau ia haavâhia no te taparahi taata; i teie nei aita i itea te hopea no taua ohipa ra.

Ia ho'i atu te boti uira o Tiare-Taina, no Teahupoo mai, ia oti te area-rea no Tiurai, ua roohia to nia iho ia'na i te peapea rahi. A ô ai ratou i roto i te ava i Atimaono ra, no te rahi o te miti, ua tahurihuri-ino-roa-hia te boti i to'na haereraa, e ua mairi e tootoru taata, oia hoi e toopiti vah ne e te hoê tamarii. Ua pohe te tahi vahine e te tamarii, e ua ora te hoê vahine. Te i'oa o te vahine i pohe ra, o Faraatua ia.

I Amerika, ua tairi te hoê vahine i ta'na tamaiti, e no te hauti puai o taua tamaiti ra, ua faatiopahia te hoê umu mori, e ua mou roa te fare i te auahi, e e ono fare atoa tei fatata mai.

Ua haapeapea-atoa-hia te mau fenua Balakana i te ueueraa fenua. E rave rahi te mau fare pureraa i pararî, e e rave rahi te mau taata i pohe roa i te hoê Sabati. Tei Bulagaria te rahi o teie nei mau ueueraa.

I te 15 no Tiunu, ua pohe roa o Tihare Leka, te peresideni no te haapaoraa Sanito i teie paeau fenua moana nei. I Amanu oia i pohe ai, e tei pihaiho mai ia'na ta'na vahine a pohe ai oia ra. Tei ta'na vahine to matou aroha rahi.

I te 24 no Tiunu, ua reva'tu te peresideni no Farani, o Raymond Poincare, i ò Beritane, ei reira farerei atura oia i te arii no taua fenua ra, ia Tihoti. Ua farii-maitai-hia te peresideni e to Beritane, e ua faaunaunahia te mau purumu e tae roa'tu i te fare no te arii. E faaea te peresideni i Beritane e toru a'e mahana ei manihini no te arii.

I roto i Tiunu, ua faarue e hoê tausani o te taata rave ohipa i roto i te mau ôraa arahu i Cloncurry i te ohipa, e eita roa ratou e rave faahou i ta ratou ohipa, e tae roa'tu i te taime e aufau mai ai te mau fatu no taua ohipa ra i te moni ta ratou i titau. E rave rahi te mau ohipa tei faaea roa no te mea aore roa e arahu. Ua tupu pinepine teie nei huru peapea i teie nei anotau.

E hoê ati rahi roa tei tupu i Niu Zilani, e i Panepe atoa, oia hoi te hoê ma'i ou'a, oia hoi te ma'i pŭpŭ. Ua hanere te mau taata i roohia i taua ma'i ra, teie râ aita rea i pohe roa. Te rave itoitoe nei te mau taote i te hoê peu no te faaoreraa i taua ma'i ra, oia hoi ua patia ratou i te rima o te mau taata aore i roohia i taua ma'i ra i te nila, ei reira paumu ai ratou i te hoê raau rii i roto i taua apoo nila ra. Ua parauhia e, o te reira ana'e ia te ravea maitai i iteahia, ei paruru i te taata i taua ma'i ou'a ra.

Ua haamata faahou te tama'i i ò te mau fenua Balakana. Aita i maoro a'enei, ua tae mai te parau e, ua hau roa taua mau fenua ra, e i teie nei, i te 29 no Tiunu, ua tama'i atu te faehau no to Bulagaria i te faehau no to Serevia. I te 30 no Tiunu, ua puai roa te tama'i, e ua pohe roa te mau taata e rave rahi. I roto i taua na mahana ra, ua pohe roa e 800 taata, e e 1,800 i puta i te ofai. E mau taata Bulagaria teie nei mau taata i pohe. Ua tama'i atoa mai to Heleni i to Bulagaria, e i te 3 no Tiurai, ua vî roa to Bulagaria.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.